

Kontuola

ANTZUOLA / Egubakoitza / 2003ko maiatzaren 23a / 158. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

LABUR

Domekan Takolo, Pirritx eta Porrotx pailazoak frontoian

Politikariendako eta hautesleendako ez ezik, Antzuolako umeendako ere egun berezia izango da maiatzaren 25a. Izan ere, Takolo, Pirritx eta Porrotx pailazo ezagunen bisita izango dugu domeka arratsaldean. *Katxiporreta* euren azken ikuskizuna taularatuko dute arratsaldeko seietan, Udal Pilotalekuan.

Pailazo beteranoak dira Takolo, Pirritx eta Porrotx; hamabosgarren urtemuga bete dute orain dela gutxi, eta, urtemuga hori ospatzeko, hain zuzen ere, prestatu zuten *Katxiporreta* ikuskizuna. Era berean, izen bereko diskoa ere kaleratu zuten.

Gerbasio eta txistulariak oso pozik azaldu dira

Maiatzaren 11n eman zioten Gerbasio Legorbururi zilarrezko domina eta Antzuolako bandera eta gutuna. Hala, egun hartan parte hartu zuten herritar, antolatzaile eta kanpotik etorritako lagun guztiei esker eman nahi izan dizkie Gerbasioak. Antzuolako Txistulari Taldeak, berriz, antolaketan lanetan eta omenaldian parte hartu zuten guztiei eman nahi dizkie eskerrak.

Kongora bidaltzeko 1.300 eurotik gora batu zituzten

Zapatu arratsaldean txistorra-jana antolatu zuten lagun talde batek eta Anelkar elkar-teak, Kongorako dirua batzeko. Eta 1.300 eurotik gora batu zituzten. Bittor eta Andres Arbulu anaiak ekainean joango dira Kongora, orain dela bi urte hasi zuten lana bukatzerara. Herri batera ura eramateko hoderia jartzen jardun zuten orduan.

Herri hartan eskola bat eraikitzen dihardute, eta eskolarako izango da dirua.

'Egunkaria'-ren alde sortutako batzordeak akzioak saltzen dihardu

AINZANE IRIZAR

Egunkari berria izango denaren proiektua aurkeztu zutenean hona akzioak saltzen dihardute herri batzordeko kideek. Datorren martitzenean, hilaren 27an, proiektu berria aurkezteko hitzaldia egingo dute egingo dute Oloran etxean, 19:00etan.

Otsailaren 20an *Euskaldunon Egunkaria* itxi eta berehala, Euskal Herriko herri gehienetan egunkari horren aldeko herri batzordeak sortzen hasi ziren. Antzuolan ere segituan osatu zuten taldea: martxoaren 4an dagoeneko lehendabiziko batzarrak egin zuten. Orduz gero *Egunkaria*-ri eta langileei elkartasuna adierazteko eta diruz laguntzeko hainbat ekimen egin dituzte.

Herri batzordearen lehenengo helburua izan zen *Egunero* egunkari berrirako harpidedunak lortzea. Azkeneko datuen arabera, 40 bat antzuolar harpidetu ziren egunkari hori egunero etxean jasotzeko. Beste 40 bat lagun, berriz, astean egun batzuetan bakarrik jasotzeko harpidetu ziren.

Gero, *Euskaldunon Egunkaria*-ri eta langileei laguntzeko



JESUS ETXEBERRIA

Hainbat ekimen antolatu dituzte herrian *Euskaldunon Egunkaria*-ri elkartasuna adierazteko.

bono-laguntzak saldu zituzten: 300 euroko bi bono eta 50 euroko hogeitun bono, hain zuzen ere.

AKZIOAK SALGAI

Behin egunkari berriaren proiektua aurkeztuta, herri batzordearen helburua momentu honetan

da eguneroko horren akzioak saltzea. Hala, San Isidroko ferian hasi ziren akzioak saltzen eta, oraingoz, 50 euroko zortzi akzio eta 300 euroko bi saldu dituzte. Akzio horiek erosi nahi dituenak Udaleko Euskara Zerbitzura jo dezake, goizetan. Orain, batez

ere, 300 euroko akzioak saltzea komeni zaie.

Horrenbestez, egunkari berriaren proiektuari dagokionez, esan bezala datorren martitzenean egingo dute aurkezpena Antzuolan. Oloran etxean izango da hori, 19:00etan.

HERRITARREN HITZA / Eneko Iturbe • Ikaslea

Bozka "eraginkorra"

Datorren maiatzaren 25eko Udaletarako eta Batzar Nagusietarako hauteskundeak direla eta, hor ari dira alderdi "abertzale" guztiak botorik erabilgarriena eta eraginkorrena euren dela lau haizeetara aldarrikatzen.

Erabilgarria, euskal gatazka politikaren erabateko konponbiderako, erabilgarria euskal herritarrok geure etorkizuna erabaki ahal izaterako orduan, erabilgarria PP-k eta alderdi espainiarrek Euskal Herriaren zapalkuntzan emandako pausoei aurre egiterako orduan.

Gainera, ezker abertzalearen legez kanporatzearen aurrean erakutsitako jarrera partidista eta interesatuaz gain, AuB eta herri plataformen aldeko botoa, alderdi espainiarren aldeko boto baliogabea dela esaterainoko aurpegia ere izan dute.

Baina zer berme ematen dute, euskal nazio aske bat eraikitzeko urratsak ematearen inguruan?



"Itxurakeriak utzi eta ekintzetara pasatzeko garaia da"

Autonomia Erkidegoko gobernuak eta bere ardurapean

Benetan konponbidera eramango gaituen bide bat garatzearen inguruan? Euskal herritarren erabakia bermatua izango denaren inguruan? Ez al zen *Euskaldunon Egunkaria* euskaldunok geure borondatez eraikitako egunkari euskalduna? Eta hala bazen, nola justifikatzen da Euskal

dagoen Ertzaintzak honen itxieraren aurrean izandako jarrera? Zergatik behar du izan hain arraroa, euskal baliabide militarra den Ertzaintza indar zapaltzaile inbasoreei aurre egiten ikusteak? Erabilgarria!

Itxurakeriak eta hitz hutsak alde batera utzita, ekintzetara pasatzeko garaia da. Euskal Herriaren aurrerabidean eta herri aske baten garapenerako bidean eman daitekeen bozka erabilgarri eta benetan eraginkor bakarra AuB eta herri plataformen aldekoa da. Euskal Herria, independentea ez bada, izango ez delako.

KIROLAK

Azkarate-Jauregi eta Lizarralde-Azkarate
bikoteek irabazi dituzte paletako finalak


A.I.

Zapatu goizean jokatu zituzten Herriko Paleta Txapelketako finaleko partiduak. Lehen mailan, Oskar Azkaratek eta Tomas Jauregik osatutako bikotea gailendu zen; bigarren mailan, berriz, Eneko Lizarralde eta Aitor Azkaratek irabazi zuten txapelketa.

Goizeko 11:00etan hasi zen bigarren mailako finaleko partidua. Ordu horretan ez zegoen oraindik jende asko frontoian, baina finalak izanda, pixkanaka-pixkanaka gero eta ikusle gehiago batu zen partidua ikustera.

Eneko Lizarralde eta Aitor Azkaratek Mendizabal aita-emeak izan zituzten aurrez-aurre partidua horretan. Eneko Lizarralde eta Andoni Rodríguez ordez jokatu zuen, Andoni kanpoan zegoelako. 30 eta 17 irabazi zuten Lizarralde eta Azkaratek.

Bigarren mailako partiduak ordu erdi inguru iraun zuen, eta 11:40 inguruan hasi zen lehen mailako finala, final borrokatua, benetan. Aitor Iraola eta Ruben Iturbe Oskar Azkarate eta Tomas



Tomas Jauregi eta Oskar Azkarate, lehen mailako txapeldunak.



Aitor Azkarate eta Eneko Lizarralde, 2. mailako irabazleak.

Jauregiren aurka lehiatu ziren. Oso partidua parekatua eta emozioz betea izan zen bigarren hau. Emaizak ere halaxe erakusten digu: 30 eta 29 irabazi zuten Azka-

rategik eta Jauregik. Azkeneko momentura arte ez zen jakiterik izan zeinek irabaziko zuen.

Aipatzekoa da, bestalde, Oskar Azkaratek eta Tomas Jau-

regik irabazi zutela iaz ere lehen mailako txapelketa. Bigarren mailakoan, berriz, Rodríguez eta Aitor Azkarate bigarren geratu ziren.

LABUR

Gipuzkoako finala
jokatuko dute
herriko gimnastek

Herriko gimnasta alebinek, benjaminiek eta infantilek bihar, zapatua, arratsaldean jokatuko dituzte Gipuzkoako txapelketako finalak. Bergaran jokatu dira finalak, Labegaraletako Kiroldegian, hain zuzen ere.

Bestalde, aipatzekoa da Uxue Arregik irabazi zuela Gipuzkoako txapelketa hila-ren 10ean. Maialen Toledo bigarren sailkatu zen eta Iraitz Gastiain laugarren.

KIROLA

PARTIDUAK

FUTBOLA

Erregionalak Kopako finalerdietarako sailkatu dira, baina oraindik zehazteke daude partiduen egunak.

EMAITZAK

FUTBOLA

Urki 3 Antzuola 7 (2. erreg.)
Antzuola 1 Internac. 0 (Gazteak)




Jose Angel Zabalo.
Antzuolako Alkatetzarako Hautagaia.

Orain Antzuola.



Bozkatu eraginkor.



M25 / ANTZUOLARAKO EGITASMOAK



GERTU GAE

Igogailuak jartzeko laguntzak ematen jarraitzea proposatzen dute

Hona hemen prestatuta zuten programaren hainbat puntu:

► **OSASUN ZERBITZUA**
Osasun Zerbitzua euskalduna izan dadin urratsak ematea eta zerbitzua hobetzea.

► **ONGIZATEA**
Etorrinen integrazioa bultzatzeko eta adinekoren beharrianak asetzeko plangintza egitea, eta presoiei eta haien senitartekoei laguntzea.

► **GAZTEAK**
Gazteei dagokienez, hainbat ekimen azpimarratzen zituen plataformaren programak: besteak beste, euren lokala autonomiaz kudeatzeko aukera ematea eta Gazte Asanbladari laguntzea.

► **HIRIGINTZA ETA AZPIEGITURAK**
Ertzileko industrialdearen proiektua egitea, Uzarragarako bidegurutzetik Elay eta Matz-Errekarako bide berria egitea eta garraio publikoa herritarren beharretara egokitzea.

► **ETXEBIZITZA**
Igogailuak jartzeko laguntzak ematen jarraitzea eta aukera sortzen den neurrian lurzoruaren jabe egiten jarraitzea, besteak beste.

► **IRAKASKUNTZA**
0 eta 3 urte artekoen ziklo osoa publikoa izan dadin behar diren kudeaketa lanak egitea eta Herri Ikastetxearekin lankidetzan jarraitzea.

► **EUSKARA**
UEMAren helburuak betetzea eta erabilerā bultzatzeko kontzientzia kanpainak egitea.

► **KIROLA**
Kirolaren oinarri konpetitiboa eta sexukeria alde batera laga eta oinarriztat osasuna eta pertsonaren bilakaera integrala dituzten praktikak bultzatzea. Eskola kirola babestea eta bultzatzea ere zehazten zuten euren programan.

► **EKOLOGIA**
AHTren aurkako jarrera azaltzea eta baso publikoak gehitzea proposatzen zuten, besteak beste.



EAJ-EA

Adinekoei laguntzeko programak eta ekimenak bultzatuko dituzte

► **ETXEBIZITZAK**
Sustapen berrien alternatiba bezala, herria birgaitzeko politikak bultzatzeko konpromisoa hartzen dute, batez ere Hirigune Historikori eta Birgaitze Integralari dagokienez. Bestetik, lurzoruaren alorrean, Udalak lurrak bereganatzeko beharrezkoak dituen aurrekontuak bultzatuko dituzte, kontrolatutako prezioak izango dituzten etxebizitzak bultzatzeko asmoarekin hain zuzen.

► **MERKATARITZA, INDUSTRIA ETA ENPLEGUA**
Gaur egungo merkatuari lurzoru industrial prestatua eta lehiakorra eskaintzeko beharrezkoak diren inbertsioak suspertuko dituzte. Hori guztiori, baina, herriko enpresekin lankidetzan egingo dute, hain zuzen ere, enpresa horien beharrianak eta iritziak jakin eta garapen ekonomikorako baldintza egokiak eta giro onena sortu ahal izateko.

► **HIRIGINTZA ETA INGURUMENA**
Gizakiaren jardueren garapenerako egokia den hiri egitura diseinatu dute; horretarako, besteak beste, oinezkoendako bideak sortzea eta zirkulazio arazoak dituzten gunek arintzea beharrezko ikusten dute.

► **GIZARTE ZERBITZUAK**
Gizarte laguntzarako ekintzen artean, pertsona nagusiek euren betiko ingurunean irautea benetan ahalbidetuko dituzten zerbitzu, baliabide eta prestazioen bidetik joko dute: etxeko laguntza, eguneko zentroa, pertsona adinduak zaintzen dituzten familiei laguntzak...

► **HEZKUNTZA, KULTURA ETA KIROLA**
Kulturarako baliabide egokiak ezartzeko eta gaur egun dauden azpiegituren kalitatea hobetzeko ahalegin guztiak egingo dituzte, gizarteak unean-unean dituen eskaerei behar bezala erantzun ahal izateko.

► **GAZTERIA**
Eskola ikasketak egiten eta lehenengo lana aurkitzen lagunduko diete gazteei, horretarako beharrezkoak diren ekintzak bultzatuta.



PSE-EE

Beheko Auzorako plan integrala diseinatzeko premia ikusten dute

► **FUTBOL ZELAIA**
Futbol zelairako instalazio egokiak lortzea, belar artifizialarekin. Horretarako, lankidetzan bultzatuko dugu enpresa eta erakundeekin: Gipuzkoako Foru Aldundiarekin, Gipuzkoako Futbol Federazioarekin...

► **IBARRE**
Auzo horretan lursailak ahal den lasterren erosteko premia ikusten dute, beharrezkoak diren urbanizazio lanak egin ahal izateko eta auzokoendako aparkaleku gehiago egiteko.

► **ETXEBIZITZA**
Gaur egungo arazo larrietako bat etxebizitzarena dela ikusita, Udalak bultzatutako etxebizitzak egiten jarraitu behar dela uste dute, eta politika hori indartu eta bultzatuko dute.

► **BEHEKO AUZOA**
Beheko Auzoak urte dezente dituela eta auzo horretako beharrianak zeintzuk diren kontuan hartuta, plan integral bat egitea proposatzen dute sozialistek, eraikinak eraberritzeko informazioa eta laguntzak emanda.

► **ERREPIDEAK**
Saihesbideak eragiten dituen arazoak eta segurtasunik eza konpontzeko Gipuzkoako Foru Aldundiak hartutako konpromisoa ahal den lasterren bete dadin lortzeko ahalegin guztiak egingo dituzte, batez ere, Antigua eta Errekalde pareko errepide zatiari dagokionez.

► **GIZARTE ONGIZATEA**
Azkeneko puntua, baina euren iritzi garrantzitsuenetakoa, adinekoei laguntzeko programak eta ekimenak bultzatzea da; adinekoei gero eta herritar gehiago dagoela kontuan hartuta eta gizarteko sektore berezia dela eta, euren lagun egiteko hainbat ekimen abian jartzea proposatzen dute, besteak beste: telealarma zerbitzua herritarren artean ezagutzera ematea eta zabaltzea, auzoen tutoretza programak ezagutarazi eta bultzatzea eta nagusien beharrianak erantzun dieten hainbat programa eta ekimen kudeatzea.



PP

Herri mailako Segurtasun batzordea eratzea proposatzen dute

► **GIZARTE ONGIZATEA**
Familiarekiko eta adinekoren bizi kalitatea hobetzeko konpromisoa hartzen dute. Horrela, besteak beste, honako proposamenak egiten dituzte: familia ugarien aldeko politikak ezartzea; drogen aurkako orientazio kanpainak egitea familiei laguntzeko; dependetzia egoera larrian dauden pertsonen laguntzeko programak abian jartzea.

► **GAZTEAK**
Lan Heziketako programak bultzatuko dituzte; tolerantziaren, elkartasunaren eta zeregin publikoetan parte hartzearen gaineko sentsibilizazio ekimenak bultzatuko dituzte gazteen artean. Haurdunaldien, anorexia eta bulimiaren eta gazteen osasunarekin lotutako hainbat gairen gaineko informazio programak bultzatuko dituzte.

► **KIROLAK**
Eskola arteko txapelketak indartzen saiatuko dira; Guraso Elkarteekin lankidetzan, eskolatik kanpo ere kirol jarduerak bultzatuko dituzte; kirolaren betiko balioak bultzatuko dituzte eta gutxituei eta adinekoei kirola egiteko erraztasunak jarriko dizkiete.

► **ENPLEGUA**
Batez ere, gazteei, emakumei, gutxituei eta 45 urtetik gorakoei laguntzeko neurriak hartuko dituzte. Ekintzaile berriei laguntzarako eskainiko dizkiete.

► **'PLAN BERDEA'**
Herriko biodibertsitateari eusteko neurriak hartuko dituzte, naturaguneak areagotuta eta bertako landare eta zuhaitzak landatuta.

► **SEGURTASUNA**
Segurtasuna bermatzeko eta delinkuentziaren aurka egiteko neurriak hartuko dituzte. Herrian bertan Segurtasun batzordea eratzea proposatzen dute.

► **ETXEBIZITZAK**
Etxebizitza Plana egitea proposatzen dute, diru sarrera txikien duten gizarteko taldeei erraztasunak emateko eta babestutako etxebizitzak bultzatzeko. Batez ere, errentan hartzeko etxebizitzaren aldeko politika egingo dute.